

आकाशवाणी

खबरां

1. प्रधानमंत्री नरेंद्र मोदी होरें पहलगाम आतंकवादी हमले दे मद्देनजर रक्षा मंत्री ते राश्ट्रीय सुरक्षा सलाहकार हुंदे नै उच्च सतह दी सुरक्षा बैठक लाई।
2. भारत नै संयुक्त राश्ट्र च पुट्टेआ पहलगाम आतंकवादी हमले दा मुद्दा ते आखेआ जे वैश्विक आतंकवाद गी पाकिस्तान समर्थन, प्रशिक्षण ते पैहा मुहैया करदा ऐ।
3. प्रधानमंत्री नरेंद्र मोदी होरें आखेआ जे 21मीं सदी दी जरूतें गी पूरा करने लेई देश दी शिक्षा बवस्था गी आधुनिक बना'रदी ऐ।
4. विदेश मंत्री डॉ. एस जयशंकर होरें ग्रीस दे विदेश मंत्री जार्ज गैरा पेट्रिटिस हुंदे नै पहलगाम आतंकवादी हमले पर गल्लबात कीती।
5. भारत अमरीका दपक्खी बपार समझौते पर चला ददी चर्चा तेहत 23 ते 25 अप्रैल तोड़ी वाशिंगटन च बैठक होई।
6. उत्तराखंड च चार धाम जात्तरा कल थमां शुरू होग, आकाशवाणी जात्तरा दा सिद्धा प्रसारण करोग।

<><><><><><>

PM Meeting

प्रधानमंत्री नरेंद्र मोदी होरें अपने नमीं दिल्ली दे आवास पर रक्षा मंत्री राजनाथ सिंह, राश्ट्रीय सुरक्षा सलाहकार अजीत डोबाल हुंदे नै इक्क उच्च सतह दी सुरक्षा सरबन्धी बैठक लाई। सीडीएस अनिल चौहान ते त्रौनें सेनाएं दे प्रमुख बी इस बैठक च मजूद हे। पहलगाम आतंकहमले दे मद्देनजर एह बैठक लाई गई।

<><><><><><>

India-UN Attack

भारत नै संयुक्त राश्ट्र च हाल च होए दे पहलगाम आतंकवादी हमले गी सख्ती कन्नै उभारेआ ऐ ते पाकिस्तान दा लगातार आतंकवाद गी समर्थन करने गी उजागर कीता ऐ। संयुक्त राश्ट्र च भारत दे उप स्थाई प्रतिनिधि योजना पटेल होरें हाल च गै इक टी.वी इंटरव्यू दा जिक्र कीता ऐ जेदे च पाकिस्तान दे रक्षा मंत्री ख्वाजा आसिफ होरें खुल्लियै आतंकवादी संगठनें गी सिखलाई ते फंडिंग देना स्वीकार कीता हा। उनें आखेआ ऐ जे एह सब आखना सबूत ऐ जे पाकिस्तान वैश्विक आतंकवाद गी मदद करने ते पूरे क्षेत्र गी अस्थिर करने दा कम्म करदा ऐ। पटेल होरें पाकिस्तान गी इस गल्लैउप्पर बी आलोचना कीती जे ओहू संयुक्त राश्ट्र दे मंच दा इस्तेमाल करियै गलत प्रचार फैलांदा ऐ। उनें पहलगाम हमले दे मगरा वैश्विक नेताएं दी इकजुटता लेई धन्नवाद कीता।

<><><><><><>

Pak-National

भारत सरकार दे उस फैसले जे पाकिस्तानी नागरिकें गी उन्दे मुल्लख वापस भेजेआ जाग, मगरा मेंढर च रवा'रदे 11 पाकिस्तानी नागरिकें गी अज्ज वापस भेजेआ गेआ ऐ। एहूदे अलावा पाकिस्तानी नागरिकें गी दित्ता गेदा मेडिकल वीजा बी अज्जै तगर गै वैध हा।

<><><><><><>

Tourists-Spots Shut

जम्मू-कश्मीर सरकारै कश्मीर घाटी च सैलानिएं लेई 48 थाहरें गी बंद करी दित्ता ऐ। आकाशवाणी जम्मू संवाददाता दी रिपोर्ट मूजब एहू कार्रवाई पहलगाम च होए दे आतंकवादी हमले दी पछौक्कड़ च होई ऐ। इस हमले च 25 सैलानी ते इक मुकामी व्यक्ति मारेआ गेआ हा। घाटी दी कुल 48 थाहरें, जेदे यूसमर्ग, दुध पत्थरी, बंगस घाटी ते बेरीनाग गार्डन बी शामिल ऐ, गी बंद कीता गेआ ऐ। बाकी सैलानी थाहरें पर बाद्दू सुरक्षाबल तैनात कीते गए न तां जे खित्ते च सैलानिएं दी सुरक्षा यकीनी बनाई जाई सकै।

<><><><><><>

## Maha-Cabinet

महाराष्ट्र दे मुखमंत्री देवेन्द्र फडणवीस होरें पहलगाम आतंकवादी हमले च जान मुआने आहले महाराष्ट्र दे लोकें दे घर आहलें गी 50-50 लख रपे दी माली सहायता देने दी घोषणा कीती ऐ। मुम्बई च अज्ज महाराष्ट्र मंत्रिमंडल दी इक बैठक होई। इस बैठक दौरान मंत्रिमंडल नै पहलगाम आतंकवादी हमले दे पीड़ितें गी श्रद्धांजलि दित्ती। सरकार नै पीड़ितें दे परिजनें लेई शैक्षणिक ते रोजगार सहायता दा आश्वासन दित्ता ऐ।

<><><><><><>

## Gyanpath-Design

स्वतंत्रता दिवस समारोह 2025 दे हिस्से दे तौरा पर रक्षा मंत्रालय नै MyGov. दे सहयोग कन्नै 1 थमां 15 मई तगर ज्ञानपथ दे डिजाइन लेई प्रतियोगिता दा आयोजन करा'रदा ऐ। एहदा मकसद युवाएं ते जनता च देशभक्ति दी भावना पैदा करना ऐ। प्रतिभागियें गी लाल किले च एनसीसी कैडेटें, एनएसस दे स्वयंसेवकें ते स्कूल दे बच्चें आसेआ बनाए जाने आहले फार्मेशनें गी डिजाइन करना होग। पैहले त्रौनें विजेताएं गी 10 ज्हार मिलोग जिसले के पहले 250 प्रतिभागियें गी ई निमंत्रण पत्र थहोग जे ओहू अपने इक साथी कन्नै इस समारोह दे साक्षी बनी सकन। डिजाइनें गी MyGov. दी दिशा-निर्देशें दा पालन करना होग।

<><><><><><>

## PM-YU GAM

प्रधानमंत्री नरेंद्र मोदी होरें आखेआ ऐ जे सरकार 21मीं सदी दी जेडी जरूरत ऐ उसी पूरा करने लेई देश दी शिक्षा प्रणाली गी आधुनिक बना'रदी ऐ। उनें आखेआ जे केंद्र देसै च हर विद्यार्थी दी पुज्ज तोड़ी विश्व स्तरीय ज्ञान लेई आवा करदा ऐ। श्री मोदी होरें एहू गल्ल अज्ज नमीं दिल्ली दे भारत मंडपम च YUGM सम्मेलन गी संबोधित करदे होई आक्खी। उनें इस गल्ला उप्पर लोऽ पाई जे देसै दा भविक्ख युवाएं उप्पर निर्भरद ऐ जेदे लेई युवाएं गी भारत दे उज्जवल भविक्ख लेई तैयार करना बड़ा जरूरी ऐ।

<><><><><><>

## Waves

विश्व ऑडियो विजुअल ते मनोरंजन शिखर सम्मेलन वेक्स 2025 पैहली थमां 4 मई तोहड़ी मुम्बई च आयोजित होग। शिखर सम्मेलन च भारत मंडप च देसै दी विरासत ते वैश्विक मीडिया ते मनोरंजन दे बधदे प्रभाऽ दा प्रदर्शन होग। 'कला से कोड' विशे पर आधारित इस मंडप च भारत दी वसुधैव कुटुम्बकम यानि दुनिया इक्क परौआर ऐ दी भावना प्रदर्शित होग। एहदे च एहू दस्सेआ जाग जे कियां देसै दी कलात्मक परम्परा लम्में समें थमां रचनात्मक, सद्भाव ते सांस्कृतिक कूटनीति दा प्रतीक रेइयां ना। इत्थे चार खेत्तर आम लोकें गी भारती कहानी सुनाने दी परम्पराएं कन्नै अवगत करोआडन। भारत मंडप मीडिया ते मनोरंजन खेत्तर दे रचनाकारें, सहयोगियें ते परिवर्तन करने आहलें लेई इक गतिशील मंच ऐ। एहू बक्ख-बक्ख सरबंधत धड़ें गी भारत दी असाधारण प्रतिभा, उन्नत तकनीकें ते तेजी कन्नै धदे बजार दी समर्थ कन्नै जुडने दा इक महत्वपूर्ण मौका उपलब्ध करोआग। भारत मंडप सांस्कृतिक विरासत दे प्रदर्शन दे अलावा बन्न-सबन्नी सांस्कृतिक भागीदारी ते निवेश गी बढ़ावा देने च मजबूत सरकारी सहयोग दा बी प्रतीक होग।

<><><><><><>

## Jaishankar-Greece Meet

विदेश मंत्री डॉ. एस जयशंकर होरें अज्ज ग्रीस दे विदेश मंत्री जार्ज गेरा पेट्रीटिस हुंदे नै गल्ल कीती। दौनें नेताएं पहलगाम आतंकवादी हमले पर चर्चा कीती। डॉ. जयशंकर होरें आखेआ जे सीमापार आतंकवाद 'दे खलाफ ग्रीस दा कड़ा रूख सराहनीय ऐ। उनें आखेआ जे दौनें देशें दी रणनीतिक साझेदारी साहूडे सरबंध दी गहराई गी दर्शादी ऐ।

<><><><><><>

## Delhi-Fee Bill Draft

दिल्ली सरकार नै राश्ट्रीय राजधानी क्षेत्र दे निजी ते सरकारी स्कूल च फीस निर्धारित करने सरबन्धी बिल दे मसौदे गी मंजूरी देई दिती ऐ। स्कूलें आसेआ फीस च बढ़ोतरी गी लेइयै अभिभावकें दी प्रतिक्रिया गी दिखदे होई अज्ज मंत्रिमंडल दी बैठक च एहू फैसला लैता गेआ। मुख्मन्त्री रेखा गुप्ता होरें नमीं दिल्ली च संवाददाताएं गी दस्सेआ जे दिल्ली सरकार नै लोकें, खासकरी छात्रें ते उन्दे अभिभावकें गी राहत पजाने लेई ऐतिहासिक फैसला लैता ऐ। उनें आखेआ जे पहली बार दिल्ली सरकार आसेआ इस चाल्ली दा इक फुलप्रूफ बिल तैयार कीता गेआ ऐ।

<><><><><><>

## Padma-Awardee Visit

पदम पुरस्कार जेत्तुएं अज्ज नमीं दिल्ली च राश्ट्री युद्ध स्मारक पर श्रद्धांजलि अर्पित कीती। उनें राश्ट्रीय राजधानी च प्रधानमंत्री संग्रहालय ते राश्ट्रीपति भवन दा बी दौरा कीता। कल राश्ट्रीपति द्रौपदी मुर्मू होरें राश्ट्रीपति भवन च बरे 2025 लेई 4 पदक विभूषण, 10 पदम भूषण ते 57 पदम श्री पुरस्कार प्रदान कीते।

<><><><><><>

## Joshi-Workshop

नवीन ते नवीकरणीय उर्जा मंत्री प्रहलाद जोशी होरें आखेआ जे हरित हायड्रोजन भविष्य दा ईंधन ऐ। उनें हरित हाईड्रोजन दे उत्पादन च तकनीकी विकास दी दिशा च सहयोग करने लेई लौहके, मझाटले ते भलेआं लौहके उद्यमों गी प्रेरित कीता। नमीं दिल्ली च अज्ज एम.एस.एम.ई लेई राश्ट्रीय हरित हाईड्रोजन मिशन मौके पर इक्क कार्जशाला दा उद्घाटन करदे होई श्री जोशी होरें आखेआ जे एम.एस.एम.ई च विनिर्माण, इंजीनियरिंग लेई महत्वपूर्ण सहायता प्रदान करने ते नमें तकनीकी विचारें कन्नै आने दी क्षमता ऐ। एहू क्षमता भारत गी नवीकरणीय उर्जा दी दिशा च सशक्त बनाई सकदी ऐ। श्री जोशी होरें आखेआ जे 2030 तोड़ी प्रधानमंत्री नरेंद्र मोदी हुंदे नेतृत्व च मंत्रालय दा लक्ष्य 2030 तोड़ी इसी बदाइयै 5 मिलियन टन करना ऐ।

<><><><><><>

## India-US Trade

भारत-अमरीका दपक्खी बपार समझौते उप्पर चला'रदी चर्चाएं दे तैहत भारत ते अमरीका दे बंज बपार मंत्रालय दे प्रतिनिधियें बश्कार 23 थमां 25 अप्रैल तोड़ी वाशिंगटन च बैठक होई। बंज बपार ते उद्योग मंत्रालय नै आखेआ ऐ जे इनें बैठकें च बपार शुल्क ते गैर बपार शुल्क जनेय मामलें सने कई विषें पर उपयोगी चर्चा होई। बैठक च विशेष रूपै नै दौनें पखें 2025 दे अखीर तोड़ी पारस्परिक रूपै नै लाहकारी, बहुखेत्तरीय दपक्खी बपार समझौते दे पैहले चरण गी पूरा करने दे उपाएं पर विचार विमर्श कीता गेआ।

<><><><><><>

## US-Pahalgam Attack

पहलगाम च आतंकवादी हमले दे पीड़ितें कन्नै इकजुटता व्यक्त करने लेई अमरीका दे बक्ख-बक्ख हिस्सें च प्रार्थना सभा आयोजित कीतियां गेइयां। न्यू जर्सी दे एडीसन च भारत-अमरीका समुदाय दे कोई 20 संगठनें दा प्रतिनिधित्व करने आहले 300 शा मते सदस्य इस कायरतापूर्ण आतंकवादी हमले दी निंदा करने लेई किट्टे होए। एडिसन दे मेयर सैम जोशी ते न्यू जर्सी दे असेंबलीमैन राबर्ट काराबिनचक होर बी पीड़ितें गी श्रद्धांजलि अर्पित करने लेई कार्यक्रम च शामिल होए। श्रद्धांजलि सभा च शामिल भारतीय समुदाय दे लोकें राश्ट्रगान गाया ते शांति, लचीलेपन ते इकजुटता दा इक संदेश दिता। पीड़ितें लेई न्याय दी मंग करदे होई उनें भारत दे समर्थन च तख्ती च लिखे दे नारे प्रदर्शित कीते ते भारतीय झंडा फहराया। ओहियो दे कोलंबो च भयानक आतंकवादी हमले दे खलाफ एकता, दुख दा प्रदर्शन करने लेई भारतीय समुदाय दे सदस्यें भारतीय ते अमरीकी झंडा फहराया। एहू विरोध प्रदर्शन कनाडा, डेनमार्क, इंग्लैंड, फ्रांस, फिनलैंड, जर्मनी ते स्पेन च आयोजित कीते गे।

<><><><><><>

## Char-Dham Yatra

उत्तराखण्ड दे उत्तरकाशी जिले च कल अक्षय तृतिया दे पावन मौके पर गंगोत्री ते यमुनोत्री धाम दे कपाट श्रद्धालुएं लेई खोल्ली दित्ते जाडन। एहूदे कन्नै गै आधिकारिक रूपै न 2025 दी चार धाम जात्तरा दा शुभारम्भ होई जाग। 2 मई गी बट्टीनाथ धाम दे कपाट श्रद्धालुएं दे दर्शनें लेई खोली दित्ते जांगन।

<><><><><><>

## PM-Trinidad

प्रधानमंत्री नरेंद्र मोदी होरें त्रिनिदाद ते टोबैगो दे आम चुनां च कमला प्रसाद बिसेसर दी जित्त पर उनेंगी बदाई दित्ती ऐ। सोशल मीडिया पोस्ट च प्रधानमंत्री होरें आखेआ जे भारत त्रिनिदाद ते टोबैगो कन्नै अपने ऐतिहासिक ते गहरे सरबंधें गी संजोए दा ऐ। प्रधानमंत्री होरें आखेआ जे एहू भारत ते त्रिनिदाद ते टोबैगो दे लोकें दी सांझा समृद्धि ते कल्याण लेई दपक्खी सरबंधें गी होर मजबूत करने लेई कमला प्रसाद बिसेसर कन्नै रलियै कम्म करने लेई उत्सुक ऐ।

<><><><><><>

## PM-Canada

प्रधानमंत्री नरेंद्र मोदी होरें मार्क कार्नी होरें गी कनाडा दा प्रधानमंत्री चुने जाने पर ते लिबरल पार्टी दी जित्त पर बधाई दित्ती ऐ। सोशल मीडिया पोस्ट च श्री मोदी होरें आखेआ जे भारत ते कनाडा सांझा लोकतांत्रिक मुल्यें, कनून दे शासन ते लोकें बश्कार जीवंत सरबंधें कन्नै जुडे देन। प्रधानमंत्री होरें आखेआ जे एहू सांझेदारी गी मजबूत करने ते भारत ते कनाडा दे लोकें गी मते कौला मते मौके उपलब्ध कराने लेई उंदे कन्नै कम्म करने लेई उत्सुक न।

<><><><><><>

## Rijju-Haj

अल्पसंख्यक मामलें दे केंद्री मंत्री किरेण रिज्जु होरें पवित्र हज जात्तरा पर जाने आहले सब्बै 1 लक्ख 22 ज्हार 518 श्रद्धालुएं गी शुभकामनां दित्ती ते सुरक्षित, समृद्ध ते सुखद जात्तरा लेई प्रार्थना कीती। पहली डुआरी लखनऊ थमां 288 ते हैदराबाद थमां 262 श्रद्धालुएं कन्नै रवाना होई। सोशल मीडिया पोस्ट च श्री रिज्जु होरें आखेआ जे सरकार सुचारू ते बिजन दिक्कत ते हज जात्तरा यकीनी करने लेई बचने बज्जी दी ऐ।

<><><><><><>

## Weather

मौसम विभाग नै जम्मू-कश्मीर च औंदे किश दिनें तगर मौसम खुशक बने दा रौहने ते मदानी इलाकें च केई थाहें लूह चलने दी शैका जताई ऐ। पैहली मई तगर मौसम भलेया खुशक ते 1 ते 5 मई गी किश थाहें पर हल्की बरखा बरने दे आयार न। विभाग नै लोकें गी आखेआ ऐ जे ओहू अपनी सेहत दा खास ध्यान रक्खन, पानी पीन, एहतियाती उपाऽ बी अपनान।

<><><><><><>

## Parshuram-Jayanti

पूरे देसै आडर जिला साम्बा च बी भगवान विष्णु दे 6में अवतार भगवान परशुराम जी दा जन्मोत्सव बडे धूमधाम ते धार्मिक भक्तिभाव कन्नै मनाया गेआ। पहलगाम आतंकी हमले गी दिखदे होई इस बरे शोभा जात्तरा नेई कड्डी गेई। लोकें मंदरें ते धार्मिक स्थलें च किट्टे होइयै भजन-कीर्तन ते हवन-यज्ञ कीते।

<><><><><><>

## Tourists-Bhaderwah

पहलगाम आतंकवादी हमले दे किश दिन मगरा गै लोकें आतंकवादिएं दे डर-त्राह गी नकारदे होई डोडा, भद्रवाह दी खूबसूरत सैलानी थाहरें पर जा'रदे न ते कुदरती नजारों दा नन्द लै'रदे न। लोकें दा इनें थाहरें पर औना आतंकवादिएं गी स्नेहा दिंदा ऐ जे लोक आतंकवाद कोला लेई डरदे ते अज्ज बी आतंकवाद खिलाफ किट्टे खडोते देन। अधिकारिएं दा गलाना ऐ जे सैलानी पूरी आजादी कन्नै फिरा रदे न। इनें थाहरें पर लोडचदे सुरक्षा बंदोबस्त कीते गेन। उत्थे आए दे इक सैलानी नै हमले दी निंदा कीती ते आखेआ जे एहूदे कन्नै सैलसफा गी नुकसान नेई होगा।

<><><><><><>